

PREDGOVOR

Pred čitaocima se nalazi Posebni dio Obligacionog prava, koji predstavlja nastavak Općeg dijela objavljenog 2004. godine. U ovom posebnom dijelu obrađeno je dvanaest imenovanih i neimenovanih ugovora. Obrađeni su obligaciono-pravni ugovori, dok se privredno-pravni (trgovački) ugovori obrađuju u Privrednom pravu. Najveći dio knjige posvećen je ugovoru o prodaji, zbog ekonomske i pravne važnosti koju taj ugovor ima u svakodnevnom životu.

Posebna novina je ta što se prije početka teoretske razrade pojedinih ugovora nalaze primjeri, koji služe kao pomoć pri razumijevanju i lakšem savladavanju materije pojedinih ugovora. Prije čitanja teoretskog dijela primjeri služe čitaocu da pokuša prepoznati gdje u konkretnom slučaju leži problem, te da kod kasnijeg čitanja kritički posmatra ponuđena rješenja.

Sudska praksa (jurisprudencija) našla je svoje mjesto među koricama ove knjige, jer smatram da teorija s primjerima vodi boljem razumijevanju određenih instituta. Mnoge primjere sam pojednostavio i prilagodio konkretnoj situaciji, kako bi čitalac lakše razumio pojedine institute.

Knjiga je namijenjena, prije svega, studentima ali bih se veoma radovao kada bi ona pronašla put do radnih stolova drugih diplomiranih pravnika. Kritičke primjedbe će mi pomoći da uklonim uočene nedostatke, prilikom buduće razrade materije posebnog dijela Obligacionog prava.

Zahvalnost dugujem mojim saradnicama: Aldijani Smajiš i Almedini Šabić, koje su mi u svim fazama izrade knjige bile od velike pomoći.

Abedin Bikić

Sarajevo, januar 2006.